



空同集卷第十七

北郡李夢陽撰

七言歌行四十首

桂巖行

白龍不識漁溪惡化爲漁服遭人縛黃髮先生困泥  
阻白馬小兒氣揮霍道傍朽木藏蛟龍霹靂猶聞夜  
火紅寄謝少年諸數公貧賤豈必皆愚蒙桂巖紫芝  
春盡發騎驢且覓商山翁

立崖松行

峭石從龍木相樛孤松拄日崖光幽朔風北來霜雪  
暗山深草黃途路修此時亭亭見松意排空柯幹流



雲氣大厦傾時梁棟急君看此物終難棄

丹穴行哀丘翁

丘名琥號松山夷門隱人也

北風颯颯吹丹穴幽篁梧樹寒蕭屑孤鳳威垂眼流血  
蘭陽丘公昨謝世使我杯乾已數月出門騎馬向誰  
適世事悠悠忍能說薄俗蹉跎始爲敬老夫平生性  
懶拙後生譏訕轉多口白壁青蠅從點缺宋門汪隆  
頗好事見我握手肝肺熱近亦客死臨清州北望傷  
心路途絕可憐親友日零散老成耆舊灰燼滅不爭  
汝曹灰燼滅又值天寒地欲裂

苦寒行

前日雪落傷麥根北風刮地天色昏沙飛石走拔大  
樹雪積林坳出無路城中死者不知數我歸三年河  
不凍今年冰堅車可渡觸面慄慄厚地裂四顧乾坤  
莽明滅尺薪粒米貴如玉君不見日晚空墻貧士哭

夜行歌

月輪未安光已皎我行夜出夷梁道力疲足酸堤上  
坐黃狐怒立啼向我宋家宮殿盡瓦礫陂湖燒鹽焰  
婀娜忽憶東京全盛時月行對此誰能那

古白楊行

百泉東岸三古楊下枝掃拂書院墻上枝瑟颯干穹  
蒼空山野陰雷雨黑柯榦冥冥動山壁剪伐難爲棟



梁用盤踞番逃斧斤厄但見白日悲風發寧知六月  
撐霜雪烟色慘愴精靈聚孤根倔強源泉裂憶昨訪  
古憇其下居人不敢留車馬落籜尚禁牛羊食汗穢  
頗遭縣官打丞相古栢霹靂碎將軍大樹空蕭灑岡  
頭石路莎草長孫邵李許同一堂春風漂泊予到此  
不見古人惟古楊古楊蕭蕭暮流急波翻浪倒蛟龍  
泣衛女幽憂拾錦花逋臣寂寞愁難立君不見太行  
羊腸莫比數上有毒蛇下猛虎樵斤獵火不虛日桂  
栢倚桐氣悽苦嗚呼楊兮楊兮爾何盤根據茲土

泉上雜歌二首

游子樂遊復長嘆臨深坐歌白石爛石泉漠漠常東

流我今胡爲坐泉頭渚花冥冥野陰薄谿日杲杲蒼  
雲愁君不見古來爭戰地山寒雪暮風颼颼

二

美人被服貂襜褕春日遊行春水曲綠蘿無烟山雪  
暝扣石長歌嘆幽獨撥刺紅鱗錦湍游我欲釣之且  
復休金盤玉箸在何許爲爾臨淵淚如雨

自從行

自從天傾西北頭天下之水皆東流若言世事無顛  
倒竊鈎者誅竊國侯君不見奸雄惡少椎肥牛董生  
著書番見收鴻鵠不如黃雀啁盜跖之徒笑孔丘我  
今何言君且休



大梁城西門行

水門堤口雙栢樹種之何年不記數風飡雨蝕生氣  
微枝葉半凋委官路烏鴉螻蛄復啄食我行見之淚  
如注古來根本忌先撥嗚呼柰此棟梁具及今可爲  
當語誰半夜吞聲向北去

羈旅翁行

自焚闕里手植檜天下斯文忽墜地錦衣使者日旁  
午青衿胄子時流涕霾風翩翩起白旄五月黃塵暗  
天際君不見河上羈旅翁時乖此老遭拘縶

寶刀篇

我有吳王雙寶刀龍鱗雪花爛照地奉君清宴可君

意佩之十年不曾離黃金鑿帶白玉鈎出入魍魎  
魅愁功高見疑反遭怒此物拋擲今兩秋丈夫生世  
輒軻亦如此終日戚戚何爲爾

秋夜嘆二首

君不見梁上蝠飛走掠蠅虫蠅虫四散不受掠而我  
胡在縲紲中豈卽運命委霜雪要知腐草生華風沉  
吟徹夜不能寐此時天風雨將至但聞虫聲啾啾復  
啾啾鴻鴈嗷嗷忘南北

二

臭虫多足蚊有翅當我眠時忽而至憤悶披衣坐嘆  
息竟夜搔爬無氣力寒霖蕭蕭響荆棘君不見坎燈



無煙四壁暗野狐跳梁鬼啾唧

思歸引

疾風吹寒破南極凍雨澌澌山樹黑天昏歲暮自憂  
併中夜悲歌淚沾臆起視衆星白爛爛我今胡爲在  
長安思歸路阻多苦寒嗷嗷何處失羣鴈翅濕高飛  
嗟汝難

歸來行

天下儒冠豈盡誤迂謬棄捐仍道路九月江山凍煙  
霧百年裘馬衝霜露窮達自知休怨天歸來且種東  
陵田齒過四九已不小釣魚獵兔亦得飽

弘治甲子屆我初度追念往事死生骨肉愴

然動懷擬杜七歌用抒憤抱云耳

吁嗟我生三十三我今十年久不見濁涇日寒關塞  
黑杳杳松楸隔秦甸梁王賓客昔全盛我父優游誰  
不羨當時携我登朱門舞嬙歌媵爭看面二十年前  
一回首往事凋零淚如霰嗚呼一歌兮歌一發北風  
爲我號冬月

二

母之生我日初赫缺突無煙榻無席是時家難金鐵  
鳴倉皇抱子走且匿艾當灼臍無處乞隣里相弔失  
顏色男兒有親生不封萬鐘於我乎何益高天蒼蒼  
白日凍今辰何辰夕何夕嗚呼二歌兮歌思長吾親



儼在孤兒傍

三

有弟有弟青雲姿以兄爲友兼爲師十五徧探古人籍十九不作今人詩從兄翱翔潞河側寧料爲殤返鄉域孤墳寂寞崔橋西渺渺遊魂泣寒食嗚呼三歌兮歌轉烈汝雖抱女祀終絕

四

有姊有姊天一方風蓬搖轉思故鄉歲收秫秉不盈百男號女啼常在旁黃鳥飛來啄屋角碩鼠唧唧宵近牀洪河鬪蛟波浪怒我欲濟之難爲梁嗚呼四歌兮歌四闕我本與爾同肉血

五

古城十家九家空有姊有姊城之中峭壑直下五千尺鷄鳴汲回山日紅犁鋤縱徒把豈得病姑垂白雙耳聾小孤癡蠢大孤惰霜閨夜夜悲迴風嗚呼五歌兮歌五轉寒崖吹律何時變

六

水河蜿蜒雪爲岸忽得鯉魚長尺半剖之中有元方書許我是月來相看臘寒歲窮多烈風日暮高樓眼空斷梁都北來道如砥孰馬輪輪爲誰絆嗚呼六歌兮歌未極原鴿爲我無顏色

七



丈夫生不得志居人下低頭覩面何爲者薄祿不救  
諸親饑壯志羞稱萬間厦東華軟塵十丈紅入擁簿  
書出鞍馬王門好竿不好瑟何如歸樵孟諸野嗚呼  
七歌兮歌思停極目南山空翠屏

解酋行

都昌縣南乾沙上射鴈者誰三五羣氈帽紅裘黃戰  
裙云是解酋官達軍沙下北風吹艦旗邊軍懼喜家  
軍悲朝廷日夜望俘至雪凍酋船猶住茲縣官逃走  
驛官啼要錢勒酒仍要鷄姚源遺孽尚反覆爾曹不  
得誇遼西

西來行

冬廿六日十二月西來泛湖雨明滅雨寒著樹盡成  
雪天波靄霏路幽絕鵝鷓禿鷺立如人銜魚避船偷  
眼嗔天開獵夫會尋汝乘時早可收其身

飛蟻嘆

李子宮江西時觀事感心作飛蟻嘆暨西來行  
也

今朝天光鳥鳴喚草萋柳長江渙渙惟爾飛蟻何爛  
熯填門撲牕坐我案夜來不虞風驟至屋瓦吹飛船  
打岸孤城晦冥霏霏雨前叫鵝鷓後鵝鷓共言此崇  
飛蟻爲我欲擊之還復嘆明明上天非無宰蟻也鎖  
細何須笑災祥感召固其理先時苟備終無患君不



聞漢家滿堂客不貴徒薪貴焦爛

士兵行

豫章城樓饑啄烏黃狐跳跟追赤狐北風北來江怒  
湧士兵攫人人叫呼城外之民徙城內塵埃不見章  
江途花裙蠻奴逐婦女白奪釵環換酒沽父老向前  
語蠻奴慎勿橫行王法誅華林姚源諸賊徒金帛子  
女山不如汝能破之惟汝欲犒賞有酒牛羊猪大者  
陞官佩綬趨蠻奴怒言萬里入爾都爾生我生屠我  
屠勁弓毒矢莫敢何意氣似欲無彭湖彭湖翩翩飄  
白旛輕舸蔽水陸走車黃雲捲地春草死烈火誰分  
瓦與珠寒崖日月豈盡照大邦鬼魅難久居天下有

道四夷守此輩可使亦可虞何況土官妻妾俱美酒  
大肉吹笙竽

癸酉生日

廬山臘日地凍裂白猿鹿鹿啼深雪卧病松林北岸  
湖黃蒿古阪行人絕已今行年四十二我辰安在百  
憂結小孫呼爺戲牀側縱惱忍能卽嗔說

豆莖行

昨當大風吹雪過湖船無數冰打破冰驤嵒崑山嶽  
立行人駭觀淚交墮景泰年間一丈雪父老見之無  
此禍鄱陽十日路斷截廬山百姓啼寒餓旌竿凍折  
鼙鼓啞浙軍楚軍袖手坐將軍部兵蔽江下飛報沿



江催豆莖邑官號呼手足跛馬驟鷄犬遺眠卧前時  
邊達三千軍伍箇病熱死兩箇彎弓值凍不敢發昔  
何猛毅今何懦李郭鄴城圍不下裘度淮西手可唾  
從來強弱不限域任人豈論小與大當衢寡婦携兒  
哭秋禾枯槁春難播縱健徵科何自出大兒牽纏陸  
挽馱

餘干行

荒濱鶻立夕啼鵲春行緣岸竹木枯黃蒿破屋走白  
狐東至信州西鄱湖男兒輸粟婦刈芻問誰爲此軍  
前須去年冰雪十丈餘凋瘵至今猶未蘇姚源帶甲  
已數萬巖淤莫展金僕姑近聞殺官兵復北道路誼  
傳真有無安能飛刀取賊顱貂裘白馬還京都

義魚行

漢江七月黃水漲男婦義魚立江上岸斜波緊煦泡  
轉千人目側精相向巧者十义五义中血飛銀尺翻  
金浪鱗魚中义獨更穩頭之泥沙半倔强我舟其時  
行邁此仰視皇天色惆悵深山藥苗熟流汝一毒江  
河萬形喪鱗鯨糜爛不直錢小瑣暴棄同蚶蠖走鯢  
吞泓若山滾蹴踏猶能開浩蕩渡子徒誇好身手如  
飛快槳誰曾傍夜風大聲吼盤渦地坼湏洞厖鼉鼉  
如甕之蛟手可得蛇龍豈復安巢窩消息定理魚柰  
何



襄陽歌四首

烈風夜行峴山道天陰城空鬼鳴嘯兼葭委折波濤  
白通濟橋頭老鷓鴣人言黃昏虎搏牛牛虎兩傷歸  
各憂萬事豈爾能前謀不如置之寬且休君不見百  
足之虫光如虹雷火燒死枯樹中

二

峴石巉巖孤根深下盤厚土雲氣陰中有千萬竅突  
如風來遇之如笙琴昨當醉狂推撼此天地忽然爲  
之動山鳴鬼哭百獸吟我時便欲驅使六丁移之去  
家遙屋卑無頓處於平一石且無頓處徘徊歸來日  
沉樹

三

襄陽山勢何所似東如翥鳳西虎蹲墓堆纍纍不空  
地於中豈少英雄魂大堤先前花艷時朱樓細柳黃  
金羈但看舊園歌舞處掘發金釵知是誰君今有酒  
不飲恨不駟馬軒車馳縱及金張許史將焉爲身後  
埋沒蒿草疇見知

四

昨來三日雨不住逢人面色如地皮老龍之堤豈易  
打襄陽難是養魚池南倒江勢雖洶湧我堤如山撼  
不動但慮禍患起細微丁寧疆吏防螻孔我聞斯地  
連年乖雨暘二麥乾死秋禾傷衆心訥訥久未定小



兒何得跳商羊天公好生民壽康

苦雨篇

波濤日陷蛙鳴起梁園一夜滿城水屋廬半塌塌人  
死可憐哭聲木聲裏憶昨出飲黃昏歸零濛已灑力  
尚微豈知中宵鬼神怒雷翻電滾雨如注我時怵惕  
不得眠燈撲殺無計燃洶湧一任霹靂走恍惚若  
有蛟龍纏地軸震仄久益急披衣起坐坐復立鷄鳴  
氣勢幸稍緩積漸天明日光入琴沾書濕開我堂二  
儀高下雲低昂黃鸝晒翅燕語梁前何恐懼今何康  
萬事夷險誰豫量及時弗樂頭顱蒼

苦雨後篇

小兒嚶啞始學語育之後屋逢今雨包裹移置夜我  
旁兒驚屢叫安之乳霆雷繞繞屋瓦震疾電繞床亂  
走鼠太兒明農隔城住卽有緩急誰視汝旦日報至  
心則降雨未傷人傷稷黍前時三月點雨無大兒憂  
色禾半枯日日望雨雨反茶盪然猷猷爲江湖天晴  
微風波不動溝渠四注長河湧明晦反覆何代無囑  
兒更備宜秋種

久雨柬黃子

微晴見月月仰瓦城中水淹雨猶下郊園浹旬不一  
出不畏衝泥畏沒馬苔蘚自上匡氏壁蓬蒿日深仲  
蔚舍人言甲子船入市幸君豫問能舟者

初雨夏甲子也



種竹

自從有竹水爛死使我竟日顏不歡頃來移置復傍  
此遽覺六月回秋寒龍姿鳳苞生不易可憐蕪沒今  
人棄窈窕郊園草樹中何人道有凌雲器

放蛇引

花蛇錯落五色備毀垣掘出蛇驚悸昂頭宛頸若有  
訴盤旋瞥捩如奔避深山大澤豈無窟荒郊短草真  
何意豺虎公然白晝行花蛇何得更縱橫祗知毒口  
能戕物未解皇天實好生洪流自古容微細吾叱園  
丁縱蛇逝風驅雷霆急雨過彩虹倒掛青天霽  
空同集卷第十七

空同集卷第十八

北郡李夢陽撰

七言歌行四十首

送何舍人齋詔南紀諸鎮

先皇乘龍去不返悲風慘淡吹宸極四海哭若喪慈  
母百官狂走天爲黑憶昨臨危坐御床手挈神器歸  
今皇密語丁寧肺腑裂三老親聞眼流血金滕立剖  
石室秘此事難從外人說我君謙讓不可得割哀踐  
阼弘祖烈日月重懸萬國朝雷雨赦過羣方悅越南  
海北霹靂動蠻夷盡奉王正月此時九道使臣出舍  
人亦輟螭頭筆白馬朝騰薊北雲錦帆暮閃江沱日



江沱秋交多裂風洞庭雲夢俱眼空巴陵縣令舍人  
兄接詔會弟西樓中童年題詩在高壁六載不到紗  
爲籠南嶽以南惟峻山苦蒸毒霧何盤盤天王新令  
雷電掣妖蛇不敢啼林端五溪官長喘喙拜黔州父  
老垂淚看却瞻蒼梧雲氣黑斑竹臨江怨幽色翠華  
縹緲空冥間此時此恨誰知得君不見馬援柱孔明  
碑剝落黃蒿裏千年莓苔待君洗萬里之行自此始  
歸來何以獻天子

上元訪杜鍊師

宣皇昔時乘八風御龍遊戲行煙空馬前兩兩侍玉  
女別館多在蓬萊宮朝天宮中舊時殿樓臺書鎖無

人見琉璃井塌青苔滿松栢森森月如練嗚呼往事  
難具陳燈火如山又一春北斗壇西訪隱淪我師黃  
衫白氈巾坐我更致西樓賓玉杯瀲灩赤瑪瑙織罽  
四角銀麒麟酒肉山堆滿堂醉仙厨徃徃來八珍孝  
宗之朝五真人師也磊落當其倫自言召見親賜食  
曾把丹書獻紫宸如今寂寞看春色銀魚玉帶無消  
息豈惟魚帶無消息欲語吞聲淚沾臆勸師對此莫  
酸辛世間萬事如轉輪且將芝草供生計聊與煙霞  
作主人月偏彩雲當牖生旋呼兩童吹玉笙聞師妙  
得逡巡術百壺倒盡還須傾古來仙子尚誰在飲者  
翻垂千載名名垂千載亦區區酒闌燈昏夜復徂不



見泰陵草已宿春生樹啼雙老鳥此時亦應羣帝趨  
金燈翠旗光有無

奉送大司馬劉公歸東山草堂歌

東山有草堂縹緲雲嶠孤前對祝融峰下瞰巴陵湖  
明公昔時此堂居麋鹿熊豕當窓趨洞庭日落風浪  
湧倒影射堂堂欲動慘淡誰聞紫芝曲獨善不救蒼  
生哭先帝親裁五色詔老臣曾受三朝祿此時邊徼  
多戰聲曳履謁帝登承明謝安笑却淮淝敵魏相坐  
測單于兵九重移榻數召見夾城日高未下殿英謀  
密語人不知左右微聞至尊羨自從龍去不可攀公  
亦卧病思東山湘娥含笑倚竹立山鬼窈窕堂之側

上書苦死只欲歸聖旨優容意悽惻內府盤螭縷金  
織賜出傾朝皆動色白金之鉞紅票記寶鈔生硬鴉  
翎黑崇文城門水雲白是日觀者塗路塞城中冠蓋  
盡追送塵埃不見長安陌人生富貴豈有極男兒要  
在能死國不爾抽身早亦得君不見漢二疏千載想  
慕傳畫圖卽如草堂何處無祿食醜竊胡爲乎乃知  
我公眞丈夫嗚呼乃知我公眞丈夫

二月四日部署宴餞徐顧二子

春日載陽官署幽東吳二子過我游庭空日斜吏人  
散窅然何異經林丘今晨驚蟄暖氣達昨夜哀鴻呼  
故儔中庭古槐蒼蘚溽上有百鳥何啁啾倉庚交交



刷其羽君看巨細各有求明時冠軒幾邂逅得暇胡  
不攀淹留自從去年識徐顧令我意氣傾南州徐郎  
近買洞庭拖顧子亦具錢唐舟浮生飄轉若飛藿倏  
忽聚散誰能謀風光爛熳况復爾願寫清壺銷客憂  
故人苦稱不好飲舉杯入唇還復休妙歌時時激慷  
慨鄙夫何以答綢繆嚴柝沉沉靜夜色北斗倒掛城  
南樓祗恐天明驅馬出攬袪延望河之洲

七峯歌壽范郎中淵

我聞桂陽江上峯平地突出七芙蓉三峯岌嶭如列  
戟四峯裊裊翔飛龍孤水東來走其下上巖下巖惟  
古松有時雲霧滿四壑洞中仙侶時相逢使君磊落

中行後家傍前峯對江口暗想精靈盤礴初嶽降生  
申理或有平生氣與蒼壁高落筆煙霞常在手六載  
爲郎不愛身五十生兒將白首湘南新鮮紅勝玉燕  
京高會多名酒歲歲登堂娛笑笑歌歌我七峯爲爾壽

送人還關中

得萬字

君不見劉毅貧時一擲常百萬君不見唐時鄭虔道  
高坎壈腹無飯英雄際會各有時人生豈必皆如願  
關中老翁燕薊客昔何慷慨今何怨王通無媒畚叩  
關楊雄有賦何由獻君歸射獵南山麓得錢且學樊  
侯販

寄兵備高僉事江



三月無雨乾殺麥六月雨多禾耳黑長江浪高蛟龍  
鬪陶河瀾鵜啼清晝此時憐君備吳越天陰不見日  
與月白衫鹽徒慣風濤我軍慎勿貪倉猝

寄內弟玉

自汝林居將一月我心不寧長憊憊郊寒歲暮風色  
苦曠野無鄰天雨雪亟欲載酒往問子水路難行畏  
踰跌豈無輕裘與快馬玉也視之如敝幘此道於今  
識者稀勸弟寬懷慎藥物

雪柬鄭生

夜來雪花如掌大無事閉門但眠卧僵牛死馬非所  
慮天翻地裂疇能那近時好事最者誰徽州鄭生差  
愛我甕頭春酒不餘瀝天明梳洗午尚坐北風其涼  
二儀閉雪吹飛沙映天過老夫畏寒况無力生也乃  
是雄豪佐梁園之陌平若掌放兔呼鷹無不可不然  
騎驢學爾祖乘興一鼓山陰柁

吁嗟行示周生

吁嗟周生千萬駒今行不得如蟾蜍雖有寶劍寒吹  
毛一日不遇成鈿刀子不見豐城紫氣干雲霄鹽車  
之下多悲號張華伯樂行相遭

送鄭器

梁園仲冬雪積阻慘慘風亂平沙樹泥深馬瘦不得  
行縹緲金陵在何處青絲絡酒提玉瓶強出送子城



東亭旦望淮河暮江水雲飛鴻鴈天冥冥

寄鮑宇

愧我夷門草堂寂種菊蕪穢生蓬蒿爾家華堂近江  
澣開花爛熳秋雲高去年此日同爲客今年對菊遙  
相憶黃山練水在何處獨倚南牕望南國

三鶴歌爲丘三公壽亦載厥實事焉

老鶴東來度海水與雌俱飛引其子回翔萬里始一  
息丘家麥田澤泚泚迢迢洗濯飲食足烟如煙雪無  
泥滓此鳥千年丹始成口銜赤玉蒼龍精落地化作  
金光草采食還丹毛骨輕古來拔宅將妻子肯使丘  
翁地上行

君不見贈鄭莊

君不見江上鴈嗷嗷喚儔侶勁羽輕毛常趁風往來  
漂泊如羈旅男兒落地既有身誰能齷齪猶婦人懷  
中有劔亦不貧吳下阿蒙君莫嗔

嗚呼行寄康子以其越貨之警

嗚呼皇天不可測一冬無雪春無雨黃霾翻風白日  
動前飛禿鶩後飛鵠堂堂古路長蒺藜萬家之城走  
豺虎百姓誅求杼柚空兒號女啼守環堵饑寒盡化  
爲盜賊可惜良民作囚虜腰弓帶箭百成羣少年馳  
馬仰射雲蒼山日落行旅稀醉唱胡歌各自歸山東  
趙實已授首南陽回賊同猪狗諸君但欲樹功業玉



石俱焚理或有近者內丘大寧河橫賊八騎持干戈  
裕州知州與賊戰康也扶柩衝之過資糧蕩盡僅身  
免月暗天昏路途遠吉人作善番軻痛哭寒城白  
雲返頃聞留滯在襄國百口仰給縣官食吾兄匹馬  
走問之半月更復無消息夜立中庭北極高晝看河  
朔風沙黑汝寧以南上尤赤空城二月生荆棘斗米  
可以換嬌女牛馬餓死枯蒿側比來官吏守空印拖  
男抱女盡向北卽防此輩更充斥恐汝後歸歸不得

送席副使監貴州屯學二事歌

席名書字  
文同蜀人

我昔在北京送君向河南豈料在河南送君如白蠻  
瘴雲蒼蒼途路艱牂牁羅施皆峻山法官要自褰帷

入倏忽開明衆山出大抵夷狄似禽鳥制之雖勤忌  
拘急此曹亦是人心性頃來漸慕衣冠習文翁化蜀  
豈無本李牧屯田務招輯所恨故人限萬里令我蚤  
夜心於邑丈夫已際飛龍會野人猶抱枯魚泣感新  
懷舊心肺酸萬事回頭百憂集弘治之間時世異與  
君次第陳封事許身謬比漢賈生推君每稱唐陸贄  
朝回對坐香爐省出門並結青雲纜自從分手哭遺  
弓縉紳漂泊余亦同抱甕梁王修竹園遺址宋帝蓬  
萊宮生涯放逐似羈旅混迹迂腐隨村翁曾聞伏櫪  
有老馬豈卽道路傷秋蓬天下瘡痍况未息西南貢  
篚防難通杜鵑尚識君臣禮蛟龍終收雲雨功相如



諭蜀文章壯馬援平交德業雄扶危濟弱付公等臨  
岐悵望天南鴻

送鮑激還歙

昔時賢達或未遇途路坎坷常固窮鹽車騏驥亦拋  
棄人生豈得無西東君年五十猶未通江湖去住隨  
飛鴻黃山紫陽日索寞題詩蚤向軒轅宮

送鮑相如金陵

去冬君行雪積阻相送城東念羈旅今冬相逢不逾  
月再別令我情更苦金陵市頭酒如蜜此去酣歌與  
誰侶我在梁園獨岑寂莫教碧草生春渚

君不見贈馬僉事應祥

君不見庭中樹今冬憔悴春作花君不見桑上草今  
陽籍土抽紫葩富貴詎有種貧賤豈無涯君今身為  
指南車何不留之殿京華北游漢水南長沙君雖在  
漢水與長沙高不愁虎卑無蛇

得馮御史允中書

鳳凰不識梧桐樹一落蓬蒿鳥雀欺滄洲鴻鵠長毛  
羽縱有雲羅柰爾為昨日郴陽馮侍御臨流寄我錦  
雙魚黃河峻嶒雪十丈過臘逢春始得書開緘不見  
下江舸梅花滿枝空淚予

秋夜徐編修宅宴別醉歌

徐郎三杯拂劍且莫舞聽我擊節歌今古曲長調悲



不易竟天地熒熒月東吐燕山八月風力怒落葉交  
加映尊俎愴時感事百憂集死別生離同一苦身逢  
累朝全盛日弘治之間我親覩朝廷無事尚恭默天  
下書計歸臺府五陵鞍馬速雷電千官氣勢如風雨  
却憶年年秋月時日與爾輩同襟期如澠之酒差快  
意袒跣呼號百不思絃張柱促衣冠禍綜覈崩奔學  
士疲倉皇世事難開口物極則還理宜有羸疾已分  
沙田草遭逢復折都門柳富貴在天得有命人生反  
覆如番手不見去年臨別處吞聲躑躅鶯求友邂逅  
寒暄不自知隔絕榮華爲誰守歌殘酒乾天欲曙門  
外驪駒已西首哀鳴胡鴈亦南飛露濕群星朝北斗

發京別錢邊二子

秋風淅淅吹燕山游子杖劍出燕關車脂馬飽夜將  
發錢邊二子來相攀此時羣星觀上帝驂鸞翳鳳雲  
之際君不見牽牛與織女一水盈盈獨流涕

東園翁歌

東園翁今六十餘面常泥垢髮不梳身藏寶劍人不  
識反閉衡門讀古書此翁十五二十時歎唾落地迸  
成珠陸機不敢以伯仲管輅警敏空嗟吁生鱗卽與  
蛟龍伍未汗寧同凡馬趨爾時射策黃金闕三百人  
中最英發驍驕舉足狹萬里便欲登天攬日月豈知  
德尊常軼軻獨買扁舟泛吳越三十年來萬事變富



貴於我真毫髮歸來灌園種瓊花荷鋤自理東門瓜  
夜眠海月掛丹牖晝看江風滾白沙遼東合有逢萌  
宅齊西再覩陶朱家北郡李生三十六擯斥高歌卧  
空谷前輩後輩道豈殊同坐同行限江麓東望東園  
亂心曲安得逐爾騎鴻鵠

苦熱柬屠叅議

豫章之熱真毒滯六月已破仍不禁赤雲行空日在  
地萬里一望炎煙深東蒸扶桑榦欲槁黑河水乾龍  
不吟院松亭亭我所愛比遭摧炙無好陰縱令跣足  
欲何往此地寸冰如寸金層簷大厦尚喘喙矮屋茅  
堂淚滿襟滕王有閣高百尋閣下澄江清映心紫薇

使者卧其上卷幔恰對西山岑赤脚門子搖大扇行  
坐吟哦揮素琴幾欲往訪簿書積豈我無酒同誰斟  
亭午蘊隆潭水沸蛟蜃下徙黿鼉沉何況走原獸棲  
枝禽嗚呼豫章之熱其苦有如此而我胡爲營營與  
世爭華簪

白鹿洞別諸生

東南自有匡廬山遂與天地增藩衛山根插入彭蠡  
湖崢嶸背殺三江勢地因人勝古有語於乎萬物隨  
興廢學館林宮客不棲千巖萬壑堪流涕文采昔賢  
今尚存講堂寂寞對松門松門桂華秋月圓拄杖高  
尋萬古源梅嶺古色照石鏡扶桑丹霞迎我軒絕頂



坐歌霜月淨石潭洗足芝草繁更有冠者五六人峭  
崕窮嶂同攀蹇草行有時聞過虎旦暮時復啼清猿  
我今胡爲公務牽蟋蟀在戶難久延出山車馬走相  
送落日遂上鄱陽船生徒綵戀集涯滸孤帆月照仍  
留連情深過厚亦其禮謏薄竊愧勞諸賢明朝伐鼓  
凌浩蕩五峯雙劔生秋煙

豫章遇鍾子送贈

豫章八月江勢輕水關行馬沙觜平聞君纜舟挽君  
住向夕惡風銀浪生頃時收帆萬船集波顛石倒蛟  
龍立中流艤子獨何意歎及猶搖雙槳入天清未風  
君已迴帆色迢迢萬里來拂衣漢口鳧鴈亂擊榜南  
浦芙蓉開漢口逢君又南浦人生聚散風中雨黃石  
公赤松子在何所君今抽簪我簪組

董公衙賞緋桃行

吁嗟董公垂老官不遷途雖坎坷志不變三歲提兵  
兩列銜此事堪傷亦堪羨二月南風捲章水黃昏西  
省開芳宴刑司軍司皆集衙盆中緋桃俄放花董公  
捋鬚向客誇客起環視咸咨嗟情酣展轉移燈照酒  
氣撲花花欲笑逢人合與世酪酊衰顏苦被春勾調  
君不見玄都觀裏樹不與武陵源上殊時來開落各  
異地董公董公今宵與客且倒花前壺

得家書寄兄歌



三年路遙消息阻緘書實凍兄心苦鴻鴈無愁奮翅  
難鶴鴿且暫遊寒渚時望東湖西日微雪冬廬嶽北  
思歸獨虞四海干戈滿生別悲傷見面稀

寄鄭生歌

南康烈風無時休將歸船滯增煩憂空城雪埋狐兔  
走十日凍合鼉河洲廬山咫尺不得往汝在梁園獨  
予想開緘嘆恨東遊阻琅玕天姥春空長

余鄒二子遊白鹿書院歌

洞原路冰山徑微二子日遊過夜歸巖宮古刻徧覽  
讀馬時蹉跌泥在衣頃來烈風號季冬雪霾不見五  
老峯苦心數子守寂寞我病講堂虛鼓鐘二子此行

真特奇異時獨往今可知虎吟狐啼且不懼肯使楊  
朱泣路岐

戲贈周紀善

廣文先生何爲者十欲出門九借馬只今徒步襄水  
濱衰鬢漠漠常風塵鳳凰在笈鷄啄食首荷闌干半  
青黑君不見楚筵醴罷暮歸來甌塵妻子無顏色

龍沙行別袁生

君不見玉虛觀前松去年凍乾今復生樹靈力排雷  
雨會幹大每與蛟龍爭下有萬古不定之龍沙風滾  
無時休英雄奮發各有時運至賈販皆公侯腐草尚  
爲螢何況堂堂七尺軀萬物之靈高牙大纛苟不我



石泉白雲誰復爭舉眼江漢鴻冥冥與爾倒此沙頭  
瓶

潯陽寄毛君湖口

大江六月涼風發匡廬清波滾明月削出萬朵青芙  
蓉水底搖動金銀闕美人盈盈坐湖縣昏叩石鐘曙  
晞髮悵望迢迢碧雲合早晚扁舟向蠻越

鄭生山游歸予作此歌

跂予望之六六峰欲往爭柰今嚴冬石林崎嶇積雪  
盛日中無煙虎豺病生也孤往胡所稀凍攀幽嶮探  
其微手皴面黑逾旬歸太室少室何者奇曾否首陽  
歌采薇北邙逶迤清洛遠天白氷崇伊闕晚灞上騎  
驢爾靡辱袁安高卧吾應覩忽然想生經行宋家陵  
往來寂寞東西京翹首淚下嵩山青

丈人行

丈人九十牙齒存行曳竹杖挈玄孫只知灌園同漢  
陰何須采藥游鹿門山房春歸碧草萋蕙帳月白露  
滿蹊少微星沈湖水湧松林夜夜猿嘯啼

鶴癯子歌

鶴癯子汝人也而何爲乎鶴形美髯修修雙瞳青閉  
肆夜讀黃庭經晨出荷鏡掘茯苓鶴癯子汝豈無萬  
里骨刀劍翮路遙朋寡日云暮弱水蓬瀛壯心隔君  
不見江中老龍亦高卧鶴乎鶴乎誰汝那



寄殷給事中歌

斑鳩賦形百鳥內化爲蒼鷹百鳥避秋空萬里試一  
擊灑毛紛紛稱鷹意迴旋簸蕩風沙開海寧光清鸞  
鳳來天地炯炯元精回此以贈君君毋猜金陵雖隔  
黃金臺汝翊紫蓋臨三台飛章御覽不十日道路聞  
靜豺狼哀憶昔匹馬長安走殷何徐陸皆吾友楚姬  
娉婷華色並殷生稜眉獨方口何郎短小亦不醜此  
離今各經年久夢寐猶存上苑花飄零寂寞西湖柳  
丈夫致身貴不朽陟要階華亦何有賈誼才名信早  
知姚崇相位非難取大江滾滾東北趨羣龍霜螯鼉  
呌呌汝登鳳臺念老夫爲我致一鳳之雛我不敢玩

亦不敢狎誠心餽飼毛羽全使聽簫韶翔舜都

送田生赴京歌

正月八日天驟黃大風晝晦沙飛揚河水慄烈人不  
行駕鵝鵠鴈交踉蹌黃鵠呼曹厲毛翼一舉橫天向  
天北君不見左生北上田生俱長安走馬花九衢

送陳冠歌

虎子墮地氣已龕驕驕汗血自爲駒陳生垂髫骨卽  
殊雙瞳炯炯唾成珠前年汝與計吏俱承明謁帝未  
生鬚丈夫志欲日月並雲雨且使蛟龍湏冬風獵獵  
吹楚湖憐汝送母催楚艦調羹臘盡江門水戲彩春  
停汴上都憶昔乘驄按南國汝在諸生獨英特三秋



自阻北飛鴈萬里今逢舊顏色私計彭宣晚必親敢  
言裴儉前能識寒溫始知君子厚杖屨番增世人惑  
匏子柳煙風日和力疾送子臨黃河汝親日望泥金  
使老夫擬作瓊林歌

芝梓行

崑崙子之來也李子觴焉及夜瓶芝自墮以爲  
梓行觴焉平可檠二觴行之穩持之輕客大駭  
笑歡盡醉而李子賦詩

霜嚴夜清月在南燈明酒溫客氣酣銅瓶玉芝鏗墮  
地客將傳玩誇神異仰芝把蒂行金杯蒼文古紫當  
筵開已驚瀲灩茵茵動更詫屈錯蛟龍迴憶芝初出

盤精氣雲流石立魍魎避赤箭琅玕色盡枯神訶鬼  
守求非易泄秘真遭天地怒懷珍顧使時人忌自從  
獲芝升我堂琴書几席俱輝光晴日徐看瑞氣合炎  
天每挹仙雲涼燕山豪士來何方悲歌起舞宵未央  
芝乎自銜亦太異頓令四座深杯觴觴行逶迤月轉  
白月色芝光巧相射醅醕觸擊瑪瑙碎淋漓迸落真  
珠赤君不見玉屈卮金叵羅珠花繡草柱自艷停杯  
聽我芝梓歌

空同集卷第十八



芝平

天在野山雲

蘇芝長非堂琴書八節

守未非其歎殊真豐天此然

盤計席雲飛可立眼眼

空同集卷第十九

北郡李夢陽撰

七言歌行四十首

朝飲馬送陳子出塞

朝飲馬夕飲馬水鹹草枯馬不食行人痛哭長城下  
城邊白骨借問誰云是今年築城者但道辭家別六  
親寧知力死無還身不惜身為城下土所恨功成賞  
別人去年賊掠開城縣黑山血送單于箭萬里黃塵  
哭震天城門晝閉無人戰今年下令修築邊丁夫半  
死長城前城南城北秋草白愁雲日暮鳴胡鞭

胡馬來再贈陳子



冬十二月胡馬來白草颺颺黃雲開沿邊十城九城  
閉賀蘭之山安在哉傳聞清水不復守遊兵早阨黃  
河口卽看烽火入甘泉已詔將軍屯細柳去年穿塹  
長城裏萬人齊出千人死陸海無毛殺氣蒸五月零  
冰凍河水當時掘此云備胡胡人履之猶坦途聞道  
南侵更西下韋州固原今有無從來貴德不貴險英  
雄豈可輕爲謨尚書號令速雷電抱玉誰敢前號呼  
遂令宵旰議西討茲咎只合歸吾徒我師如貔將如  
虎九重按劔赫斯怒惜哉尚書謝歸早不覩將軍報  
平虜

張將軍塞獵歌

將軍堂堂七尺軀虎頭昂藏紫虬鬚據鞍笑撚金僕  
娃弦鳴仰墮雙飛鳥南平川漢北殲胡蛇矛卧地刀  
劔蕪朔風吹霜塞草落馬騰士奮于狩作將軍夜令  
晨步同積沙黃黃日色薄部下游擊五千人競時爭  
能各有神驅飛翼走入我網千隊萬隊何駢駢氣酣  
前赴逞一決零亂旌旗倏明滅殺氣上回靈武雲火  
烈直透天山雪張公覲此番逡巡紅衣白馬如神人  
衣也蟠蟒金麒麟朝廷所賜榮功臣攔頭報捷者誰  
子手提禽獸血滿身生截罷豹纍雉鷄中軍小校額  
抹巾見之一騎風起塵左射奔鹿右斃豕更追狡兔  
趨窮榛張曰於乎奚用是昊天肅殺存至仁縱金按



節止中野燁脂包鮮燕蒐者禮樂行軍分自嚴賞罰  
正簿誰能假何地真收吐谷駝一卒乃獲大宛馬長  
城窟水胡鴈稀輕輦緩吹諸部歸懸戟慘淡鴉鳥委  
垂鞍礮礮熊兕肥少年猶忿殺獲微翻身毅弩追雲  
飛我聞蒐狩古侯禮三驅六御今何以纘武雖存于  
貉文戒荒合避長楊侈將軍抹馬厲部士爲防西北  
烽烟起

送仝儀賓朝天歌

風吹黃塵暗河甸行子拍馬來相見春寒晝陰沙冥  
冥九衢散亂花如霰自言手捧紫瑤函馳軺謁帝黃  
金殿甥壻當朝禮覲同往來遣答猶親面南陽貴人  
骨固殊敦親倍錫明光宴八議輕微實惋惻時情詎  
識皇心眷開函爛熳百色備龍盤鳳曲流雲氣繡女  
咨嗟鋪緒工體裁昭合三宮意吳羅疊雪祗懷赧南  
金象齒堪沉避自離京國十年餘每懸金闕憶金魚  
班行日侍諸王聘混一曾瞻萬國書君過上林聊駐  
車春風舊樹花應舒有暇更欲問西湖掃地垂楊今  
有無

送田氏

寒城野霜鴻嗷嗷羊腸木零熊豹號彼汾沮如望心  
勞葭菼委折風波濤山西刑司氣何豪西邁白日行  
旌旄七星丸九明佩刀君不見黃河飛雲立如蓋一



鷓鴣乘之向并代

贈鄭郎

郎來張拱向我揖玉樹亭亭我旁立叩之論語背誦  
畢曲禮幼儀汝能習黃河柳綿飛欲盡練水桐花放  
將及汝父昨來今汝歸有琴在抱書在笈君不見師  
山後人代非乏勉旃無効羣兒狎

太華山人歌

山人昔居太華峯結屋玉井餐芙蓉夜隨金精朝白  
帝誤搗天鼓撞鴻鐘帝怒謫之荒江濱淚添江漢齊  
朝宗閭闔九重豹虎蔽霜雪十年鴻鴈冬江邊諸山  
不可眼夢寐猶跨雙茅龍有時夢到西嶺坐環海內

物盡么麼一線黃天涇渭流拳石白晝岷峨破翳鳳  
驂鸞覲玉京羽節雲輶度婀娜織女虛無指前路沐  
髮有盆不借我山鬼含笑倚巖立仰看明星斗如大  
猿啼蛇吟萬壑靜山人歸來淚交墮

相逢行贈劉按察元瑞

一別六年不相見風塵歛靚劉郎面西關官亭車馬  
都使君驄馬朱雀符有虔秉鉞映交衢把臂道故情  
鬱紆仰視高天白日徂憶昔同殿含香趨萬事反覆  
難具鋪秋風颭颭響枯樹蛟龍立闔黃河怒舟子無  
憂旬浹阻大夫且試登高賦城南柳徑梁王苑廟門  
書院松林晚此時與子臨高臺邊侯綺席金尊開芒



碣微雲氣出沒但見悲風萬里從東來寒空孤鴈叫  
且哀鶻鷁鼓翅號其儕飛沙激霧相徘徊願賓與主  
醑酏歸不見昔時杜甫與高李三子者氣壓百代今  
塵埃

王郎行

王郎行者贈王氏二郎者也王郎將試於有司  
予於是賦王郎行贈焉夫子賤君子稱之魯頌  
人族類彰諸詩蓬麻自直事有本因予故侈其  
家世并及其父子兄弟之間

將軍開國弓劔傳子孫章甫能朝天相國沉冥二十  
年懷寶弗售人所憐飛纓躍馬赫動地公也視之如

浮煙雅歌日醉金尊前生有三男子不令學劔令青  
編大郎早躡黃金榜聲名佐郡青雲上二郎穠鬱更  
英特掇青拾紫猶翻掌三郎年十餘頭顱角漸如拱  
立向人前解背經與書二郎昨別我云將還故鄉馬  
蹄馳逐秋槐黃龍泉出匣光自射驂騮歷塊疇能當  
連翩騎從喧皇州春風紫陌行鳴騶生兒當如孫仲  
謀于嗟相國胡所憂濁醪惟恨不滿甌聽我王郎行  
我行還自歌何以贈之珊瑚柯又何贈之玉山禾願  
郎歸白玉珂

郭生行

君不見大梁郭生少小能英竒生長富貴心寒饑兀



坐日誦書與詩下究王伯上軒羲郭生有父王國賓  
有母食邑稱之君鯉庭獨立猶詩禮熊膽親丸或夜  
分生有兩男子大者覽輝起次者郭生鼓翅亦上青  
霄裏憶昔匹馬走燕甸長安三月花如霰射策曾登  
金馬門垂衣 帝在蓬萊殿三十年間萬事變後生  
袞袞蜚英彥結綬初誼東閣賓彈冠復報南州薦太  
平旣極邊功開武帝射蛟江未迴上林會有誇胡獵  
願生早試長楊才

結交行贈李沔陽

古人結交如種稷今人當路栽荆棘世間萬事各有  
極人生何必相傾反君不見李沔陽五馬非朝天天

冰地裂衝寒煙三月不遇見天子歸途困頓心憂煎  
南行波濤值洶湧蛟龍失勢鼉鼉踊留滯聊栖梁孝  
臺醉歌真據侯嬴塚却憶當年侯未鬚識者盡道驂  
騮駒落筆遽掩羽獵作挺身遂上青雲衢百戰不俟  
李廣辱一麾出守延之吁峽靈光射卞和玉月明淚  
迸鮫人珠李沔陽汝無學雲夢谷亦莫效江南哀六  
龍挽車日月輪萬里簸蕩風沙開棄君舟楫理銜轡  
有人物色騰驤材

蕙苾行贈王氏

南征馬援還東都人言滿載皆明珠發封視之乃蕙  
苾羣臣失色天子吁世情毀譽本好惡後生輕信迷



真誤暗投固宜明月棄同居豈免娥眉妬自君夙夜  
歌在公尊中醴酒常不空德尊日見兒孫盛名成反  
致讒邪攻雖云喬樹多烈風曷有寸霧殘高空君不  
見周時吉甫稱大賢孔門弟子推顏淵撥蜂拾塵尚  
見惑豈我千得無一愆君堂有客俸有錢槐庭偃蹇  
花含烟胡不酩酊金壘前萬事置之休問天

徒步東行贈鮑敖

鮑生六月徒步東久暝赤日昏沙風旦行眼眩扶桑  
紅足疲暮憇空桑中帽浥衣沾乾復濕必逢佳樹始  
一立道傍有驢無錢騎短詠微吟口翕戢杜甫遺詩  
人罕全鮑生記之將及千論工尚恨黃初淺泥古常

卑大曆前豈知才大番爲崇臨岐獨下楊朱淚鹽車  
雖蒙苴滓辱長鳴未折風雲氣生今坎珂三十年同  
時細估豪熏天出門寶馬雙翩翩道逢鮑生不舉鞭  
生不見五殺大夫歌屢屢商歌飯牛聲夜悲賢達困  
窮何代無仰視萬里浮雲徂

夏日田居蘇生攜酒見過

疾風六月樹枝折火雲纍鎚白絮裂城南老夫正高  
卧荒郊款段蘇生過塵埃滿面鬢髮亂手攜清壺來  
餉我季子才名三十年射楊百發百葉破逢時幸首  
南宮薦塌翮尚忍西山餓丈夫生世古難同蘇也巷  
西我巷東追尋不計襤褸熱淹留祇恨金尊空君不



見昨朝雨雷今則風世事反覆誰豫通得時無誇好  
身手失意豈必皆愚蒙野池紛披蓮半紅黃鸝噤語  
空林中勸子盡醉休匆匆人生幾何吾已翁

送人使安南

安南陪臣騎馳突歌吹春喧洱水窟蛟潭飛雨動霹  
靂島城毒雲開日月黃門使者白澤袍南來氣與秋  
天高當今天子古聖人諭爾歲事勤包茅未令炎海  
無波濤

有鶴篇贈翟翁

有鶴褊褊海上來乘風爰止梁王臺洪河怒濤野蕭  
瑟含情顧影却飛迴十洲來往群仙戲舉身下上隨

雲氣君不見夜來東海頭南極一星光照地

賦得姑蘇臺送李推官士允

少年何官騎白馬秋日經過古臺下回瞻遠慮意  
促下馬行歌淚盈把倚嗟築此誰爲臺千年棄土猶  
崔嵬屨廊娃館瓦礫積美人白骨生青苔枯蒿虫吟  
莽颺颺飛雲叫鴈雙徘徊當時金屋玉起樓豈謂臺  
成麋鹿游寶鈿黃金裹瑟瑟雨時濯出樵人收李生  
豪士扶風儔悲歌久抱流連憂世家各讀日一過獨  
廢吳越傷春秋復思鴟夷氣益奮怒目每送長濤流  
抉眼東門事已往茲臺再過君休上日暝煙波湖水  
深范歸恐有同行槩



送王子歸鄆杜

賢兄已上蒼龍閣，令弟猶甘飽藜藿。膝下雖無一寸綬，腰間常吼千金鏢。騎驢狂走長安市，酣歌擊缶白日落。黃金不成徒自嘆，烏裘脫盡那堪着。道逢石室舉鞭揖，謂爾骨相殊不惡。終南鄆杜豪俠窟，從來意氣無京洛。歸家早鑄雙玉龍，提攜來獻明光宮。

贈鄭生

狐裘騮馬誰家子，往來馳驟塵沙起。右撚羽箭左把弓，仰射忽墮雙飛鴻。野寒日昏慘慘風，下馬揖我立我東。一箭直西貫楊樹，抽身上馬入城去。

石峯子歌

石峯子昔住石峯山，茅堂巖壑豁研間。松孤桂叢白日靜，坐玩硯礪聆潺湲。石峯子驂鸞覲帝，今幾秋狝猿哀嘯，鴻鵠愁頊為四岳。振南州，珠崖瓊海毒厲收。丹穴有鳳鳴啾啾，願子早致儀。西周經過舊山莫淹留，君不見舊山頭。葛藟蔽翳寒泉流。

寄寄庵子

寄庵子嘗曰：人生寄爾然，利孰與義安？愆孰與不愆？美久臭孰與芳，末庫部駱子以其言告李子。李子曰：卓哉張子，持此於天下，誘之能移，撼之能動，平能招之來，麾之去，乎於乎張子者，足以荷天下之重矣。於是作寄寄庵子詩。



嚶其鳴矣彼何求天下願識韓荆州心傾義投神便  
往萬古不廢江河流張侯崛起西南裔覽輝振翮風  
雲際鉤陳蒼涼閭闔閉排闥直謁蓬萊帝豸冠峩峩  
不動紳挺身遂作蘭臺賓竊憤辛裾謂洪忍誓與朱  
檻爭嶙峋已看騾裹狹道路復訝鴈鴉卑風塵霜飛  
維揚海月苦陽行沮洳汾花春還朝袞衣換日月立  
仗正色楷星辰行步既工馬從瘦諫草每就鷄將晨  
餘力猶馳翰墨圃先秦兩漢文心苦壯志真趨劔閣  
銘張孟陽幽懷緬擬歸田賦張平子拖珠響玉豈不足  
面徒餐竟何補及時願作朝陽鳳不然退與漁樵伍  
予也綸竿孟諸客心本無他衆莫自李白世人欲殺

之蘇軾能詩遭貶斥雷劔雖埋光在天下玉未剖終  
爲石垂老重逢四海清虛名幸免諸公擲思君欲追  
嵇呂駕贈言輒踐回由迹顏淵季路有田負郭不餓死且  
自射獵芒碭澤

龍仙引贈駱負外

壯士狹四海萬古一大夢俗夫醯雞耳生死不出甕  
滅没等蒿草勞勞竟焉用君求勾漏學稚川往來棲  
息羅浮烟自從異人授丹訣行地乃作飛龍仙左攜  
浮丘右洪厓樗里景純執我鞭崑崙嶺嶠倚天外黃  
河九曲如衣帶南支江湖楚蜀匯北支嶮塞華夷界  
少時振衣登賀蘭開眼已無西北山中年謁帝聽廣



樂曳裾赤手搥天關朝攬金臺雲夕披玉峯霧翔鸞  
鏘鏘導前路左蹲文豹右伏虎旂幢旖旎雜翠葆龍  
兮龍兮汝雖變化叵測慎無使頭角露祥麟威鳳世  
見希泄秘盡巧鬼神怒深山大澤多戢鱗龍也穆沕  
幸自珍緱城玉笙兩鶴舞太室珠樹三花春從茲謝  
人放浪去笑跨白鹿乘飈輪

送李中丞赴鎮

黃雲橫天海氣惡前飛鷺鶴後叫鶴陰風夜撼鑿無  
間曉來雪片如手落中丞按轡東視師躬歷嶮隘揮  
熊貔已嚴號令偃鼓角更掃日月開旌旗椎牛李牧  
將士躍射虎李廣匈奴知屯田金城古不謬賣劍渤  
海今其時塞門蕭蕭風馬鳴長城雪殘春草生低飛  
鴻鴈胡沙靜遠遁鯨鯢瀚海清不觀小范擒戎日誰  
信胷中十萬兵

雨燕醉歌

迅雷擊城鴉欲翻黑雲壓天白晝昏展席斜對城南  
門長安大雨如傾盆我馬已惜錦障泥主人况具黃  
金尊睥睨將將下萬瀑龍蛇緜緜動高壁出門牛馬  
不復辨炎霧毒蒸靜如拭酒酣爲君如意舞夕雨轉  
急風轉怒祗恐谿壑受不得海倒江翻亦難測

結腸篇三首

李子曰結腸之事蓋予妻亡而有此異云奠妻



以牲烹腸焉腸自毬結李子異焉曰胡爲烹胡  
爲結恍惚神恠孰主孰使厥理孰測怨邪德邪  
生有所難明死託以暴衷邪嗚呼嗚呼作結腸  
篇焚妻柩前妻固識文大義或亦契其冥懷也  
哀者且停聲弔客坐在堂聽我結腸篇曲短哀情長  
五月廿七吾妻亡厥明奠之羅酒漿其牲伊何豮與  
羊痛哉金釵結豮腸神靈恍惚心駭傷團團肉毬出  
中湯左迴右盤準流黃經緯纏糾文陰陽底形井字  
圈兩旁翼翼彷彿雙鳳凰有綏在下纍而長上有提  
襟五寸強汝乎無意豈爲此呼汝欲問魂茫茫十呼  
不應百轉咽腸乎腸乎爲疇結

二

結腸結腸忍更聞妾年十六初侍君父也早逝母獨  
存爲君生子今有孫昔走楚越邁燕秦萬里君寧恤  
婦人外好不補中苦辛中年得歸計未久命也百病  
攢妾身言乖意違時反唇妾匪無迂君多嗔中腸詰  
曲難爲辭生既難明死詎知千結萬結爲君爾君不  
妾知腸在此

三

結腸三闋聲更咽汝腸難解我腸結夙昔失意共奔  
走汝實千辛我踰跌宕歸家定今稍寧豈汝沉緜遽  
離絕魂乎魂乎游何方兒號女哭週汝旁劇心飲泣



看彼蒼愚者何壽慧何亡佇立逶迤若有望迫而卽  
之獨空床梁間二燕哺子急觸落青虫汚我裳錦衾  
塵埃委鴛鴦總帷中夜風琅琅魂驚夢搖中慘傷陰  
雨啾啾燈無光嗚呼此曲不可竟爲君賡歌妾薄命

哀才公

正德己巳年作此公嘗薦余故有國士之感

仲冬東南天鼓鳴我軍滅胡功可成道之將行歲在  
己星落轅門悲孔明尚書頭顱血洗箭馬革纏屍亦  
堪羨夷門野夫國士流痛哭天遥夜雷電是月雷電屢作

哭新縣

是時新設萬年縣新民反覆殺副使李情靈寶

人也

苦死可憐靈寶子有官十數同時死四路蕭蕭人斷  
行一軍盡驚床夜徙新民反覆誰不知性實虎豹佯  
螻蟻白金綵段縱寬汝朝廷有問將何以

觀燈行

詳見夢華錄

宋家累葉全盛帝寬大實皆稱令主百姓牛馬徧阡  
陌太倉米粟憂紅腐宣和以來遂多事嗚呼爛費如  
沙土海石江花湧國門離宮別殿誰能數羣臣諛佞  
祇自計天下騷然始怨苦正月十四十五間有勅大  
駕觀鰲山萬金爲一燈萬燈爲一山用盡工匠力不  
破君王顏此時上御宣德門樂動簾開見至尊奔星



忽經於御榻明月初上堆金盆傾城呼噪聲動地可  
憐今夜鰲山戲窈冥幻巧百恠聚金蛾翠管堪垂淚  
借問幸臣誰云是李師師外有蔡京與蔡攸夾樓錦  
幄羅公侯丞相之幄當前頭奚兒腰帶控紫騮如花  
少女擎綵毬但聞樓上喚樓下黃帕籠盤賜玉羞月  
高鳴鞭至尊起幄中環珮如流水爭道齊驅輦路窄  
寺橋窈窕塵埃白火樹龍燈又一時千光萬焰天爲  
赤常言宴安成禍基從來樂極還生悲君看二帝蒙  
塵日數月東京荒蕪藜

石將軍戰場歌

清風店南逢父老告我巳巳年間事店北猶存古戰

場遺鏃尚帶勤王字憶昔蒙塵實慘怛反覆勢如風  
雨至紫荆關頭晝吹角殺氣軍聲滿幽朔胡兒飲馬  
彰義門烽火夜照燕山雲內有于尚書外有石將軍  
石家官軍若雷電天清野曠來酣戰朝廷既失紫荆  
關吾民豈保清風店牽爺負子無處逃哭聲震天風  
怒號兒女床頭伏鼓角野人屋上看旌旄將軍此時  
挺戈出殺胡不異草與蒿追北歸來血洗刀白日不  
動蒼天高萬里烟塵一劍掃父子英雄古來少天生  
李晟爲社稷周之方叔今元老單于痛哭倒馬關羯  
奴半死飛狐道處處懽聲噪鼓旗家家牛酒犒王師  
休誇漢室嫖姚將豈說唐朝郭子儀沉吟此事六十



春此地經過淚滿巾黃雲落日古骨白沙礫慘淡愁  
行人行人來折戰場柳下馬坐望居庸口却憶千官  
迎駕初千乘萬騎下皇都乾坤得見中興主日月重  
開再造圖梟雄不數雲臺士楊石齊名天下無嗚呼  
楊石今已無安得再生此輩西備胡

玄明宮行

今冬有人自京至向我道說玄明宮木土侈麗誰辦  
此乃今遺臭京城東割奪面勢創巖業出入日月開  
旃幪矯托敢與天子競立觀恐將雙闕同前屹石柱  
雙蟠龍飛梁逶迤三彩虹寶構合沓殿其後儼如山  
嶽翔天中金銀爲堂玉布地千門萬戶森相通光景

閃爍倏忽異雲烟鬼恠芄沲以東金榜祠更侈樹  
之松檟雙梧桐溟池島嶼鯁鯉躍孔雀翡翠兼羆熊  
那知勢極有消歇前日虎豹今沙虫牕扉自開衛不  
守人時遊玩搖玲瓏陛隅龍獸折其角近有盜換香  
爐銅青苔生泥鏡面鎖野鴿哺子雕花櫳憶昔此闈  
握乾柄帝推赤心闈罔忠威刑霹靂縉紳毒自尊奴  
僕侯與公變更累朝意叵測培克四海真困窮長安  
奪第塞巷陌心復豔此闈何蒙構結擬絕天下巧搜  
剔遂盡輸倖工神廠擇木內苑竭官阮選石西山空  
夷墳伐屋白日黑揮汗如雨斤成風轉身唾罵闈得  
知退朝督勞何匆匆人心嗟怨入骨髓鬼也孰復安



高崇峩碑照耀頌何事或有送男充道童聞言愴惻  
黯無答私痛聖祖開疆功渠干威福開者誰法典雖  
嚴柰怙終錦衣玉食已叨竊琳宮寶宇將安雄何宮  
不鐫護勅碑來者但看玄明宮

康郎山歌

君不見康郎山屹立東湖中波濤撼鯨山脚塌破廟  
枯木常烈風芒碭草昧赤帝出揮劍遂使凡蛇空卧  
榻之外事亦小萬方有罪惟朕躬美姬寶玉歸御幄  
浮苑蔽江江水紅發踪劉陶固其力死戰難言非數  
公秦人在哭嶠函瘞漢祖輕酬垓下功至今有廟此  
山側天陰雨濕時見朱旗白馬光如虹

乾陵歌

武后陵黃巢伐之  
事具雪航膚見

九重之城雙闕峙前有無字碑突兀雲霄裏相傳翁  
仲化作精黃昏下山人不行蹂人田禾食牛豕強弩  
射之妖亦死至今剝落臨道傍大者虎馬小者羊問  
此誰者陵石立山崔嵬銅鐵錮重泉銀海中縈迴巢  
也信力何由開君不見金棺玉匣出人世薔薇冷面  
飛塵埃百年枯骨且不保婦人立身何草草

劉子有金陵之差遂便觀省

使君昔居紫荆關日登燕嶠望吳山逢人顏色鬱黯  
黥對酒涕泗交潺湲使君南向金陵去孤帆夜拂春  
天樹旅枕常欹月落時夢魂先到雲飛處楊子江頭



青草斜大孤山前開杏花行人三月重回首游子一  
年初到家出門烟草滿芳甸鳳凰臺接麒麟殿遊陌  
聯翩追宿娛墨塲婉戀羅賓燕人生意氣無南北白  
馬青袍動江色卽看艤舸石頭城還聞稅鞅鐘山側  
鐘山翠嶺壓秦淮燕趙風雲入望來芙蓉秋鴈多愁  
思問君何日錦帆廻

送仲副使赴陝西

驄馬白玉鞍長鳴下雲端今朝發汴水何日到長安  
孝王臺前雪如山垂楊掃地春風還使君不帶冰霜  
色却帶春風入漢關相思明月樓西望古秦州河南  
咫尺不可見何況千山萬水頭西望秦州是我鄉隴

樹秦雲空斷腸褰帷杖鉞經行地欲寄雙魚到慶陽

徐子將適湖湘余實戀戀難別走筆長句述

一代人文之盛兼寓祝望焉耳

崢嶸百年會浩蕩觀人文建安與黃初叱咤皆風雲  
大曆熙寧各有人憂金鼓玉何續紛高皇揮戈造

日月草昧之際崇儒紳英雄杖策集軍門金華數子

真絕倫宣德文體多渾淪偉哉東里廊廟珍我師崛

起楊與李力挽一髮回千鈞天球銀甕世希絕鰲掣

鯨翻難具陳洪川無梁不可越日暮悵望勞余神徐

郎生長蘇臺陰二十作賦雄海濱竭來抱玉叩闔闔

長安繡陌行麒麟是時少年誰最文太常邊丞何舍



人舍人飄飄使南極直窮金馬探瀘津爾雖不即見  
顏色夢中彷彿形貌真余也潦倒簿書客諸公磊落  
清妙身大賢衣鉢豈虛擲應須爾輩揚其塵休令黼  
黻怨岑寂要與琬琰增嶙峋海陵先生雅愛士晚得  
徐郎道氣伸喬王款接雖不數邇聞亦欲來卜隣驂  
騶造父兩相值一瞬萬里誰能馴都門二月芳草發  
御溝楊柳垂條新徐郎綰牒將遠適使我旦夕生悲  
辛爲君沽酒上高樓月前醉舞梨花春天明掛帆向  
何處鴻鴈哀鳴求故羣南登會稽探禹穴西浮湘水  
吊靈均洞庭波寒木葉下峽口風急猿嘯聞司馬太  
史有遺躅歸來著書追獲麟

龍州歌送沈編修使安南

龍舟南接六那溪白鷗黑猿相間啼烏蠻灘頭苦竹  
密伏波廟前春日西揚旌走馬迎天使擁節封王壯  
漢儀試向殊邦觀禮樂交南元是舊邊陲

漢江歌送范子之桂陽

漢江江上鷓鴣鳴漢江游客無限情青山落日下帆  
影芳草月明聞櫂聲黃鶴磯頭暮雲盡鸚鵡洲邊春  
水生莫倚仲宣能作賦洞庭南接桂陽城

聊城歌送顧明府

聊城纍纍枕桑野使君懷古聊城下龍蛟慘淡七雄  
鬪當時誰是排紛者海東隱淪難見面平原不見安



平見已聞笑却邯鄲軍還遣書飛燕將箭平生急難  
輕列侯功成豈必千金酬只今往迹浮雲盡遙矚滄  
溟日暮流

空同集卷第十九

空同集卷第二十

北郡李夢陽撰

七言歌行四十首

李進士醉歸圖歌

誰將一幅雪白絹放筆橫掃黃金殿五雲飛花白片  
片李生胡此開生面御河塵昏楊柳暮彷彿初罷南  
宮宴 皇帝龍飛十二春同時三百登要津曹生李  
生余最親曹甥李也傳經人光耀雖云丈夫末不聞  
致君須致身自汝白手扣閭闔想像紫陌行騏驎曹  
留李歸事亦變李生意氣圖中見醉歸扶起杏林下  
眼花熟人無識者飛鳥來窺進士巾游絲故罨誇官



馬卽論此馬亦有神畫出紫焰方瞳真嚼勒齧膝如  
待人長行大步不動塵絡頭鞵鞞純用銀細巧似織  
翻江鱗汝昔出門驢無騎曹生共被甘鹽齏比許欲  
入周召列成就耻與蕭朱齊於乎男兒一旦榮幸果  
如此生不報國老空悔

鄭生畫像歌

巖風颭颭樹葉赤秋林紫氣丹丘積問君胡爲坐石  
根微吟極望天雲昏南歸舟楫杳將滯故園花鶯當  
復存浚儀張生好作筆貌爾形似兼其魂細模妍描  
豈乏手傳真水月烟中柳意氣朗如千里骨精神合  
居萬人首憶昨觀君飛射時彎弧走馬實男兒更求

張筆須傳此欲識豪雄豈啻詩

畫魚歌

呂公手持畫魚障清晨掛我北堂上島嶼晴開雲蕩  
蕩衆魚出沒隨風浪四壁蕭蕭起寒漲嗟此數尺障  
天機妙入神信手掃絹素慘澹開金鱗濠梁斷裂東  
津遠任公掣釣滄溟晚此時天黑衆魚出鼉鼉徙穴  
蛟龍返或言乘潮萬魚集細小亦赴雲雷入口只尺波  
濤有得失屈強泥沙恐難立細觀又似洪河風崑崙  
旣道龍門通霹靂殷殷行地中鯉眼下射盤渦紅非  
獨一身生羽翼亦有數子隨飛龍山根小魚更無數  
鱣鮪昂藏噴煙霧美人修竿淇水闊漁子孤舟洞庭



暮我生好奇古覽畫心不動呂公此障誰爲之令我  
一見神色竦想當經營始筆端萬鈞力五湖齊傾四  
海立空隲滾滾拔浪急陽侯逆走天吳泣不然千魚  
萬魚何由集我聞神怪物變化不可料點睛破垣古  
有兆卽恐風雷就壁起饗人揮刀莫相笑

林良畫兩角鷹歌

百餘年來畫禽鳥後有呂紀前邊昭二子工似不工  
意吮筆決皆分毫毛林良寫鳥祇用墨開縑半掃風  
雲黑水禽陸禽各臻妙掛出滿堂皆動色空山古林  
江怒濤兩鷹突出霜崖高整骨刷羽意勢動四壁六  
月生秋颺一鷹下視睛不轉已知兩眼無秋毫一鷹

掉頸復欲下漸覺颼颼開風毛匹綃雖慘澹殺氣不  
可滅戴角森森爪拳鐵迥如愁胡昔欲裂朔雲吹沙  
秋草黃安得臂爾騎四馱草間妖鳥盡擊死萬里晴  
空灑毛血我聞宋徽宗亦善貌此鷹後來失天子餓  
死五國城乃知圖寫小人藝工意工似皆虛名校獵  
馳騁亦末事外作禽荒古有經今皇恭默罷游燕  
講經日御文華殿南海西湖馳道荒獵師虞長俱  
貧賤呂紀白首金爐邊日暮還家無酒錢從來上智  
不貴物淫巧豈敢陳王前良乎良乎寧使爾畫不  
直錢無令後世好畫兼好畋

吳偉松窓讀易圖歌



仄巖泉流石無數素壁濛濛起煙霧君家屋宇在城  
市何以堂上生松樹側聞江夏生氣酣掃毫素絕筆  
風雷拔地起意匠鑿天天爲怒泰山古根生眼前俄  
頃縮出徂徠山懸蘿掛薜裊裊黑復有草舍松之間  
惚間老人鬢髮秃手翻一編周易讀空山瑟瑟翠濤  
激長干冥冥暮花撲遠知旣已死希夷不復作青丘  
石室杳何許恍然置我此溪壑翻愁一夕雷電入六  
丁追書上廖廓又畫石下根屈曲如老龍胡奴暝踏  
孤巖崧蓬頭赤脚露兩肘月明汲泉山澗中却憶前  
年召畫師江夏吳生亦與之短褐垢臉見天子  
禮貌雖村骨格奇帝令待召仁智殿有時半酣

被 召見跪翻墨汁信手塗白日慘澹風雲變 至  
尊含笑中宮羨五侯七貴爭省面請觀此幅松舍圖  
黃金失價連城賤吳生吳生太氣岸一言不合輒投  
硯

鍾欽禮山水障子歌

鍾生始學戴文進後來頗自出機軸山林槎枒波漫  
靡骨格雖傳氣不足此幅樹石差可意綴得茅堂傍  
江麓連山遠勢亦可取轉折頗似蕭湘曲竹嶼陂陀  
九疑隔蒼梧洞庭濕雲白黃陵美人把瑤草天寒日  
暮行空澤鷓鴣雙飛鴻鴈宿榭樹颯颯江水碧細看  
谷口花又疑武陵源孤舟欲往不可得對此彷彿聞



清猿亭間更著四老翁衣冠各異鬚眉同紫芝山深  
石漠漠悵望萬里來悲風人生有形貴自適我今胡  
爲塵埃中觀盡感事面頰紅有畫如此何必工歌徹  
目送滄洲鴻

贈郭氏畫登遊快閣

昨朝快閣舉目無江湖凭闌二豪俱徘徊把杯思欲  
丹青寫之人則無城中郭清狂一生弄丸戲洪鑪方  
瞳如水霜半顛展紙爲掃登閣圖邑城隱見林木扶  
畫我快閣上半天風立樓觀孤急流波濤沸欲動前  
山雷雨勢可呼二豪意態各亦足彷彿指說荆與巫  
回顧東海猶一盃是日南風萬船集江隅郭亦畫出  
檣之烏精密似跨北海杜筆力頗凌江夏吳江中流  
雲西北徂又若萬里獨往潮京都我心與客方念此  
郭能畫之真奇士

觀序上人所藏陶成畫菊石歌

陶生畫菊石老草有筆力此石與此菊今爲序公得  
兩株徙倚石根前古石苔蘚屈連錢復有餘株散在  
地平坡雜草青煙絲回株點綴花翩翩含姿弄態不  
一足背向纖穠皆可目突如大家貴介女珠翠雖搖  
氣莊肅近時各手計汝和此生筆力方之過江東徐  
霖學畫石效顰差勝王與何亦知神品多冥契下筆  
巉巖拓高勢石磊磊兮菊漫漫清霜古路花斑斑遠



意頗類東林山東林昔築蓮花臺彭澤攢眉不肯來  
歸家對菊獨銜杯序公叢林號白足不重蓮花番重  
菊終然畫餅不充腹何如種向西山麓秋林寒芳采  
服食煮石煉藥亦爲得愛鷹愛馬古有之不獨序公  
何太息

題畫二首

雪城陰陰氣蕭瑟鄭生提畫來相訪面顏戚促意不  
樂告我欲買南行舫覽畫指點色惆悵雨倒江翻拔  
層浪君不見江上簑笠翁歸遲水逆憂天風

江寒雨急莽無路漁人撒網乘州霧魚蝦瑣細不直  
錢汝休輕觸蛟龍怒展畫見此心中悲犯嶮覓利占

所卑只今風浪無晨暮爲問安流歸者誰

張侯藏張翬山水歌

張翬有名成化間大塗小抹成山水樹石燥硬筆意  
古往往人間落片紙此幅粗淺色更枯或謂非翬出  
其子張侯識鑒天下精物物如金見沙底爾家圖畫  
千萬軸素壁高堂安用此寧知上智不滯物牝牡不  
貴貴者骨尺山卽如對玄圃草屋臨崖氣出沒崖根  
林堂頗清迥遠雲澹池開秋嶺霜蘿細紆巖檻暝昏  
猿接掛花溪靜自從去年拋棄官夢想山遊駕江舸  
見此拂衣便欲往攀緣轉玩情無那崖亭更著一人  
坐斗絕看書樹婀娜張侯豪曠人共知敏捷言談皆



勝我鹽車鬱沒騏驎棄蹇拙逢時每相左崑崙洞庭  
不我隔異時倘結煙霞果

畫馬行

嗚呼驂騑不可見世人任耳不任目玉勒金羈滿地  
行可道中無千里足君收此馬畫者誰凝豪苦意求  
其骨尺縑颯爽毛鬣動凌風似欲真馳突曹霸畫馬  
無此精拂拭慘澹神氣生細觀決非近代物印押剝  
落無姓名四海只今多戰爭安得此馬一敵萬絡頭  
騎出千人驚擒戎破虜任橫行

西山湖春遊圖歌

我家掛出西山圖上有西山下西湖上堂見者怒氣  
鹿問客何所怒何得生此嗔縱使撐天拄地無比倫  
古人局量非今人罅間雖添兩禿松孰與遠勢開心  
胸銀山鐵壁 皇陵東彷彿下走追飛龍一曲一折  
苦不易可憐片素騰雲氣落花冥冥萬壑靜白日杲  
杲千巖碎森沉不見雷霆仗照爍盡壓金銀寺回思  
開疆 帝秉鉞燕山突立五鳳闕錦繡離宮巖嶽入  
龍懽水戲滄溟竭君不見輦道哀湍瀉松柏摧枯虎  
出沒至今守僧住湖傍琉璃湧動鼉鼉忙事關體統  
畫合諱點綴半露還半藏伊昔休沐屢憇此耳邊尚  
憂金琳琅上林花艷何所無東風只恁吹西湖夾岸  
小杏欲爛熳騎驢紗帽西郭途同行康何咸我徒抵



須十錢買尺魚旋挑土薺甘如酥朝來青暮望湖紫  
衣行童隨挈壺大者鼓簧小吹竽爛醉花下鳥每呼  
汝曹何處吾已翁十年獨看梁園紅傷心痛定忍復  
說回首萬事真匆匆嗚呼故舊離合誰獨無使我不  
悲堂上圖使我不悲堂上圖

來青軒名  
望湖亭名

### 畫竹行

鄢陵王孫稱竹溪手自栽竹堂東西已詫白晝雷雨  
入遽使六月秋雲低王孫拈筆傳竹神不得乃憶能  
傳人黃筌異世與可滅本朝頗數東吳真一幅千金  
擲不惜有時客來掛之壁壁上階前翠相射風行琳  
琅憂摩仄四座慄慄生寒色陂陀沙嶼意勢遠洞庭

木落瀟湘晚白雲悠悠去不返叢篁寂寞雙妃怨於  
乎畫形難畫心黃陵鷓鴣啼至今月不常盈日中晷  
人生何必長悲吟堂有佳賓膝有琴美酒一酌還一  
斟竹溪子斟竹葉歌竹枝醉據玉案吹參差左杯酌  
竹右畫師李平孔乎吾則誰更須名手畫六逸并畫  
王孫逸爲七

### 題京口人山水圖

青山逶迤如北固山下彷彿京口樹茅堂花蹊三月  
暮萋萋舊草春遊路一從畫師掃煙墨客堂日夜流  
江色江色依微帶甕城遊子歸魂逗南北

### 題畫掃筆成詩



去年得歸離江州七日遂登黃鶴樓南風捲江浩呼  
洶逐轟欲翻鸚鵡洲七澤莽昧不入眼孤舟屈曲襄  
河轉數月已擲檀家湖夢飛每到羊公峴峴脚山南  
東道樓秦川公子醉悲秋檻邊斑竹古猶活雲石寂  
寞蒼梧愁重華馭遙不可叫白沙黑猿疎樹幽看圖  
彷彿曾遊處素壁青天漢水流

錢選畫張果圖歌

張果者中條山人也武后聞其有道術召之果  
遽死後復出往來汾晉閻玄宗使李嶠齋璽書  
造請焉果至舍集賢院詔肩輿入禁中問治理  
神仙之事帝悅焉欲以玉真公主妻果果不從

辭還山果蓋剪紙驢乘之不則折收巾笥中而  
錢圖故落於俗家今爲沔守李得矣

張翁紙驢真有無錢也何意傳其圖印記雖明幅斷  
裂李侯完之亦奇絕所恨圖尾錢有詩就蛇添足將  
無凝憶昔翁來集賢院入宮詔許肩輿便一日聲名  
人主動千年面目吾今見帝貌深沉玉榻雄侍人一  
異三人同漢皇信有瑤池降秦始枉慕蓬萊通玄言  
未竟鈴殿風寸驢躍出青箱空有僮追捉雙眼紅此  
驢蹶躡盤當中李侯一看一絕倒每稱獨苦嗟良工  
細觀張翁骨格古徐福五利寧其伍曰嬪真令天下  
疑端歸轉覺皇心蠱長生殿前牛女展廣寒仙桂舞



鸞身世間但識申師巧誰解中條放浪人

周文靜畫雪山圖歌

周生雪山世稀見遠水近水一疋練玉崕嶮插湖  
脚粉筆徐移掃高閣瓊枝鐵柯兩迴亞龍鱗犀甲歛  
參錯林風颭颭急霰起白日冰花逐毫落天愁地慘  
意各出霧合颺回勢逾惡人言四時冬最難周生善  
雪仍善山虛堂突立萬仞壁尺素乍轉千重灣彷彿  
寒封洛陽道得無白擁監田關袁安甘卧幾時起退  
之遭竄終召還倚山亭亭一孤松仄崖峭壑盤其中  
分毛聳幹一何傑畫者有意排嚴風君不見古來梁  
棟必此物願君愛之頻撼拂

題畫山水送人還歛

黃山沙溪杳何許圖之山水無乃是軒轅宮宰相里  
山人一出彌荆杞石林漠漠蹊徑苔霜鶴夜悲猿嘯  
哀紅顏踪跡半湖海白頭覽畫思歸來溪頭繫一船  
畫師本無意宛如倦游者無復舟航事水雲迤邐山  
雲高靜定方知動者勞回思少日懽娛地至今夢寐  
猶波濤

壽兄圖歌

倚嗟我鳳生三雛二雛成立少者殂為巢抱卵兩不  
易自挺獨立身羈孤兄既躬耕濁河岸弟亦塌翅青  
雲途兒長女大願各足鷄肥酒熟時相呼仲氏吹篪



墳者伯兄今六十我半百敢言意氣激墮俗要使紛  
紛覩標格大梁張路固好手湖州生絹照眼白當堂  
掉臂掃丹墨倏忽老面開生色盤松歲蕤雜花遠雲  
屏石几文茵輒靈芝底出琅玕瓶蟠桃突磊琉璃椀  
鶴行昂藏疑欲啄復綴山麋意逾宛大公烏紗微俯  
身中心愛弟愛復親次公髦服青羅巾傍兄祇順情  
性真壺陳爵設卽未舉儼如酬勸言辭諄其言伊何  
懷二人飄風烈烈吹三秦銜悽西望道路阻高丘莽  
沓狐兔隣又如自叙傷夙昔衰暮安寧思苦辛季冬  
十日兄生日今日天開皎日出長裾珠履坐上滿剝  
烹椎牛酒盈室此時此圖挂之壁觀者嗟咨黯如失

二公揖遜恰相向回看乃在畫圖上骨法形神各不  
疑輿臺緝御俱惆悵逶迤拂拭諸欲動展轉顧惜嗟  
宗匠瓶中梅菊誰致女倒映芝桃故相盪鞞灼真回  
綺席春芳香解溢金壘鬯兄今健飯猶廉頗丹砂我  
煉尋黃婆復聞張生善山水買絹請掃青嵯峨嵯峨  
一掃一千幅一年一幅南山歌

登天池寺歌

廬山絕頂天池寺鐵尾爲堂白石柱傳言周顛勞  
聖祖天眼尊者同顛住嶮絕下闕無底壑屈曲穿綠  
惟一路頃屬秋晴強攀陟俯之四海生雲霧岷峨纍  
垂西向我杳杳長江但東注君不見寺東崖石鐫竹



林穹碑 御製山之岑周顛胡不留至今周顛胡不留至今虎啼日暮愁人心

御製廬山周顛碑歌

廬山絕頂白鹿臺上有 御製周顛碑石龜下蹲高  
結螭天葩震烈雲漢回文古兩漢仍過之憶昔草昧  
龍虎鬪黃旗紫蓋顛能知顛也似真還似癡 帝非  
感悟寧用茲百年勢移功漸泯碑亭毀裂將及碑訶  
持白晝鬼神泣光耀天陰雷電隨先朝雖允僧奏劄  
修葺其如歸有司有司有司顛莫疑試看碑文碑後  
詩

遊棲賢橋歌

雷泉峽激石龍從日湍山陷回光動吁嗟此壯觀萬  
古誰爲開渦黃潭黑窈莫測秀黛碧玉何崔嵬人言  
窟底有龍卧氣吐白晝常風雷去年重九登吹臺翹  
望名山思婀娜今年今日誰料吾醉踏窮山躡礪砢  
拂衣欲上萬仞壁濯纓還就孤崖坐秋風吹林猿狖  
語浮橋橫空裊相拄嵐寒細飄瀑布雪峯雲破碎芙  
蓉裂金芝瑤草真有無縹緲仙燈暮明滅君不見此  
橋今千年谷冷跡絕無人煙巖剝苔蝕石漠漠太白  
紫陽俱我前對此不須更慘愴明朝且上香爐巔

懷玉山歌二首

懷玉之山玉爲峯四面盡削金芙蓉東風破碎瀑布



落有潭十八龍爲宅山頭草堂開者誰斬木通道余  
心悲白猿嘯雨巖竹裂石路上天風樹吹我聞龍乃  
變化物羣然卧此龍何爲胡不滂沱惠下土一洗四  
海無旌旗

君不見懷玉山山七盤盤盤上無極陰霾白日崖洞  
黑隆冬雨路誰來得稻田月池山上頭半天有地今  
我遊石壇剝落古佛棄木落俯見東巖秋秋中巨魚  
長如人紅眼射日翻金鱗天台桃源在何許采藥避  
秦此處吾告汝

鐵柱引

豫章古城牙城南何年鑿井置鐵柱井深江通沒不  
見時寒水涸始一露玩之非石亦非鐵孤立差牙若  
枯樹人言旌陽鎖水母此語荒唐奚所據或云藉此  
壓江濤茲理或有誰者勞顧今伏臘盡奔走歸美真  
君瑤殿高金燈翠旗日來御雕闌玉檻圍周遭俗論  
紛紛不須辨秋風日暮塵滿縣

快閣引

四月月圓登快閣天半晚窻雷雨入邑中上客攜酒  
至歐陽羅子咸來集去年爲閣初築臺我時登之雷  
雨來神明似有兩歲約晴霧歛值千山開千山迴轉  
江中流徙倚闌干增暮愁夕日下看衡嶽破波濤左  
顧匡廬浮苦思昨年生盜賊大江南接江之北烽火



遙連海岱紅殺雲眼見鄱陽黑斯邑洶洶今始安我  
今對酒能不寬諸君稍減般移苦百姓新回種植懽  
北風江湧月東來更說夙昔俱停杯陰晴倉卒不自  
料萬事恍惚誰能猜潢池暫殄干戈釁向隅猶抱瘡  
痍哀勸君置此勿復道放歌且與雲徘徊

九江陸還南康望東林

匡廬山北東林寺前年八月遊曾至只今馬出蓮峯  
道西望東林但縹緲風吹榭櫟猿晝啼卻憶石門臨  
虎溪舊聽石瀨尚在耳雷燒碑樹今應死

觀水簾泉歌

水簾瀑布人罕至三級背懸五老峯礪石嵯岬路險

澁深窟風草吟蛇龍自從開闢藏難見可憐彼瀑蒙  
稱羨走勢天晴萬古雷流光壑暝常留電亂峯雲走  
白日微翫罷催君及早歸鬼神忌才亦好靜恐有驟  
雨沾裳衣

楊花篇

洛陽三月東風起楊花飛入千門裏只見朝縈上苑  
烟那知夕逐東流水苑烟流水無休歇暖日輕盈度  
仙闕趙女瑤臺貯綵霞班娘團扇啼明月綵霞明月  
幾沉輝陌上行人亂撲衣征夫柳塞愁看鴈少婦香  
闈懶上機柳塞香闈萬餘里草色連天度隴水玉門  
關外雪猶飛章臺樹裏風先起誰家浪子千金馬平



明挾彈章臺下頭上羅巾玳瑁簪腰間寶鈿珊瑚把  
踏絮來尋賣酒家持香坐調當壚者當壚美女怨陽  
春笑掇楊花襯繡裯青樓薄暮難消遣白雪漫天愁  
殺人冥冥漠漠春無極此時惟有楊花色一朝風雨  
靡蕪爛獨慘垂條三嘆息

明星篇

正德間早起聞內教場砲喊之聲作此篇也

明星出地一文高天門沉沉魚鑰動沙堤露下玉珂  
寒直廬雞唱金蓮重千門萬戶曉鐘發明星漸高河  
漸沒燦爛疑侵翔鳳樓依稀故抱飛龍闕鳳樓龍闕  
帶曾城翠輦朱衣夜夜行黃昏競奏催花宴天明猶

聽打毬聲蘭烟桂火輝如日明星迢迢照不入百子  
池頭青草生長信宮中紫苔集草色苔香秋復春此  
日乘槎若問津明星曉落宵還見白髮黃金愁殺人

漢京篇

漢京臨帝極複道衆星羅烟花開甸服錦繡列山河  
山河自古稱佳麗城中半是王侯第峻閣重樓夾道  
懸雲房霧殿森虧蔽牧豚賣珠登要津樊侯亦是鼓  
刀人時來叱咤生風雨奄見吹噓走鬼神平津結兄  
蓋侯弟杯酒相看何意氣執鞭盡是虎賁郎守門不  
說長安尉長安烽火入邊城挺劔辭君萬里行去日  
千官遮馬餞歸來天子降階迎朱弓尚抱流沙月寶



缺常飛翰海星不分燕然先勒石直教麟閣後標名  
豈知盛滿多仇忌可惜榮華如夢寐第宅田園奪與  
人丹書鐵券成何事霍氏門墻狐夜號魏其池館長  
蓬蒿三千劍客今誰在十二珠樓空復高後車不戒  
前車覆又破黃金買金谷洛陽亭榭與山齊北邙車  
馬如雲逐陰郭豪華真可憐雲臺將相珥貂連當時  
却恠桐江叟獨着羊裘伴帝眠

去婦詞

正德元年戶部尚書韓文暨內閣師保等咸相  
繼去位李子作此詞也

孔雀南飛鴈北翔含顰攬涕下君堂繡幙空留並首

蒼羅袂尚帶雙鴛鴦菡萏鴛鴦誰不羨人生一別何  
由見只解黃金頃刻成那知碧海須臾變賤妾甘爲  
覆地水郎君忍作離弦箭憶昔嫁來花滿天賤妾郎  
君俱少年堙臺築就猶嫌惡金屋粧成不論錢重樓  
複道天中起結綺臨春照春水宛轉流蘇夜月前萋  
迷寶瑟烟花裏夜月烟花不相待安得朱顏常不改  
若使相逢無別離肯放馳波到東海薄命難交娣姒  
知衰年恨少姑嫜在長安大道接燕川鄰里携壺舊  
路邊妾悲妾怨憑誰省君舞君歌空自憐郎君豈是  
會稽守賤妾寧同會稽婦郎平幸愛千金軀但願新  
人故不如



入始入蕩子從軍行

蕩子從軍行者本駱氏蕩子從軍賦也余病其聲調不類於是改焉

胡兵十萬起妖氛漢騎三千掃陣雲隱隱地中鳴戰鼓迢迢天上出將軍邊沙遠離風塵氣塞草常萎霜露文蕩子辛苦十年行回首關山萬里情才聞突陷賢王陣又遣分圍右校營紛紛鐵騎朝常警寂寂銅焦夜不鳴滄波積凍連蒲海雨雪凝寒遍柳城地分玄微指青波關塞寒雲本自多嚴風凜凜將軍樹苦霧蒼蒼太史河揚塵拔劍先挑戰征旆凌沙犯霜霰樓船一舉爭沸騰烽火四連相隱見戈文耿耿懸落

星馬足駸駸擁飛電終當取駿效先鳴豈暇論功稱後殿征夫行樂踐榆溪倡婦銜怨坐空閨靡蕪舊曲終難贈芍藥新詩豈易題池前怯對鴛鴦伴庭際羞看桃李蹊蕩子別來年月久賤妾空閨更難守鳳凰樓上罷吹簫鸚鵡杯中臨勸酒同道書來一鴈飛此時緘怨下鳴機已剪鴛鴦帖夜被更薰蘭麝染春衣屏風宛轉蓮花帳牕月玲瓏翡翠幃箇日新粧如復罷祇應含笑待郎歸

沈大夫行

沈大夫遺我以凜冽玉壺之冰報汝以離離朱瑟之繩繩以發凌雲絕響之妙曲木以滌卓犖確礪之清



膺此曲可以崛地懿揚天經宣融風召遐齡奏之敬  
姜室允宜軻母庭沈大夫奉 詔且還家松江鱸魚  
白躍玉上居所筭如斫麻烹羊擊鼓會親戚太守長  
吏爭趣車倚乎嘉哉男兒生不顯親譬如錦衣夜行  
雖貴何足誇

雪山歌送萬子

雪山高哉危乎岌兮吾不知幾千萬仞但見雲峯之  
崔巍巖水陵競縞壑瑩石晶矐而萃嶽兮懸猱不得  
度飛鳥何由廻大峯如老翁冕珮凌紫埃諸峯似兒  
孫羅列芙蓉開江日涵湧地軸動孤光倒曳生奔雷  
岌乎危哉雪山之高不可以攀陟斧斤不入松栢如  
麻霜榦翳蔽雲根槎枒滲膏結苓實輪囷走龜蛇君  
今策駟過其下車徒滾滾如飛沙何不斷取松下苓  
獻之堂上翁上以介壽考下以召禎祥噫吁戲雪山  
之高吾不可得而名惟有峨眉玉壘萬古遙相望

廣州歌送羅參議

麗哉遐平廣之爲州兮闢炎區奧雄跨乎南陲天作  
五嶺奠玄武排空下走何崔嵬拓邦幾千祀浩蕩人  
文開秦還漢往不復識但見古城蒼蒼生綠萊上則  
盤岡曲丘龍蜿虎蹲其下膏場繡澮晻曖而滄洄水  
銀丹沙布平地珍錯奚翅犀與瑰夷舲賈舶競追逐  
白首浩淼誰曾回土產之異尚如此何況四民者挺



然叅三才君今結牒向南去清風吹袂心悠哉崢嶸  
五羊城側有千尺臺曩昔聞君坐其上醉睨滄溟如  
一杯是時榕蹊雨初霽茉莉霜成堆君嘗夢遊而神  
適焉豈知七載還復來男兒成名貴及早英雄多少  
埋塵埃羨君青髮結 明主出叅方岳聲如雷金章  
紫綬不可以幸致如君者謂非歷塊之龍媒羅浮三  
千六百丈砥律倚窮隈巨鰲戴之與波下上三十五  
蓮峯照耀雲中輝羣仙跨飛龍流影亂岩霏我欲從  
之嘆無術送君翹首空徘徊

水車行

黃門飛鞚西北趨白馬如龍血如珠萬人齊呼水窖

開大車小車如山來但見風行九市陌寧知玉積五  
侯宅道傍竭士僵闌干唇乾口燥真大難侯門晏罷  
夜烏起朱殘粉落明星裏君不見積冰化作堂前水

鹽井行

山頭井乾生棘蒿山下井塌不可熬官司白牌促上  
庾富家典牛貧典女誰其使之華陽賈華陽賈子多  
少年擁金調妓高樓邊夜馳白馬迎場吏曉貫青絲  
還酒錢君不見場吏乘酣氣如虎鹽丁一語遭箠楚

清夜引

桂魄團團霜兔泣玉龍夜吟水喉澁仙人起踏白芙  
蕖手撚一枝珊瑚株伏猊香噴紅氍毹蠟鳳啼春蝦



捲鬢光華丹焰奪行月五虬轆雲聲軋軋銀箏翠管  
 聲咿啞繁謳雜舞懽意匝盤中紫棗大於瓜誰其擎  
 之萼綠華雙桂透迤頭兩丫密情芳緒芳且嘉瓊城  
 夜半重重閉偷桃小兒安得至

空同集卷第二





